

Gregorian: Rad Institucije ombudsmena BiH je od izuzetnog značaja



Vršilac dužnosti visokog predstavnika, Raffi Gregorian, se danas susreo sa troje ombudsmena BiH za ljudska prava: Ivom Bradvicom, Jasminkom Džumhur i Ljubomirom Santićem, koje je Parlamentarna skupština BiH imenovala u decembru 2008. godine. "Pitanja ljudskih prava su od izuzetnog značaja i stoga je svrha moje današnje posjete da direktno članovima ove ključne institucije čestitam i izrazim podršku OHR-a uredu ombudsmena BiH i njegovom radu", rekao je Gregorian. Funkcionalnost Institucije ombudsmena BiH je postpristupni uslov Vijeća Evrope za BiH, dok je završetak spajanja državnih i entitetskih institucija ombudsmena takođe i kratkoročni prioritet evropskog partnerstva.

Vršilac dužnosti visokog predstavnika apelira na nadležne bh. organe vlasti da preduzmu sve preostale korake potrebne da bi se osigurala puna provedba Zakona o ombudsmenu BiH iz 2006. godine kao i spajanje državne i entitetskih institucija, uključujući prenos sredstava i dokumentacije na Instituciju ombudsmena BiH. Spajanje je obustavljeno dok Republika Srpska ne usvoji neophodne prelazne propise. V.d. visoki predstavnik je rekao ombudsmenima da vjeruje da će brojne osobe koje u Narodnoj skupštini Republike Srpske podržavaju ljudska prava uspjeti konačno usvojiti prelazne propise, koji su odavno trebali biti usvojeni.

Vršilac dužnosti visokog predstavnika je izrazio stav da vlasti u BiH ne samo da uredu ombudsmena trebaju osigurati regulatorne uslove i potrebna finansijska sredstva kako bi taj ured bio istinski neovisno tijelo koje štiti ljudska prava nego i osigurati da preporuke Institucije ombudsmena BiH u vezi sa kršenjima ljudskih prava budu u potpunosti ispoštovane te da se postupa u skladu sa njima.